

# L'ucliva bandunada

Autor(en): **Ragaz, Gieri**

Objektyp: **Article**

Zeitschrift: **Annalas da la Societad Retorumantscha**

Band (Jahr): **59 (1945)**

PDF erstellt am: **21.06.2024**

Persistenter Link: <https://doi.org/10.5169/seals-214421>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

---

---

# L'ucлива bandunada

da Gieri Ragaz, Mexico.

Igl ei ina biala spassegiada da Andeer si encunter il plaun Cagliatscha e da leu vinavon atras caglias, pastiras ed uaul tier las acclas da Magun. In gi da stad ein egls ed ureglias attents allas rueidas dils contuorns e bellezias della natira. Encunter sera cloma il zenn d'ina baselgietta tier l'uraziun. Il sulegl sezuppa davos las distontas muntognas, ch'il serenezi carsinescha. Da maneivel seaulza la silhueta della tuor Cagliatscha cun sia miraglia rutta da gitg encurclada en in vel de misteris. Ina dunna vestgida en ner passa cun ina faultsch si dies e para il maletg della mort.

«Gitg avon ch'il tat de tiu tat ha viviu, era Magun e Cagliatscha in' ucliva avdada suronn. Da leu mavan ina gada 11 umens giu Clugen tier vaschins.» Aschia raquintava miu aug Daja sco el veva udiu da buob da Hans Fravi e dad auters.

Lein ir empau las verdas sendas dell' imaginaziun! Cu po quei esser stau, che las empremas famiglias han setschentau si cheu, han tagliau igl uaul, rimnau cuschas, roma e bests en gronds mantuns e dau fiug? Il terratsch runcau era tiara nera d'uaul, resultat de mellis ded onns de carschientscha e de smarschira. La fritgeivladad de quel e de ton auter sumigliont ha gidau furmar nossa patria.

Negin dubi si Magun e Cagliatscha pulsava veta activa. «Bagnvagnia, si qua», udeivins suronn. Tgissá en quei clavau, oz sbuau, pitgavan ina gada ils flugials. Dasperas en bassa stiva musava ina tatta de filar. Ella tegia sisum admoneva forsa ina mumma ils uffons la dumengia damaun de festginar per ir a baselgia. La sera da ruaus sesevan il Gion ed il Pader sin quei crap . . . Dava ei cheu buca tut quei che pudeva legrar sempels mortals: aua ed aria, iarva e glisch, forza e veta? Ozilgi dattan aunc fastitgs per-

detga ded in vitget pers, ded in vitget ch'ha mort cun ses avdents, sepulius en la notg dils temps.

Ual sco antruras ein praus e pastiras ch'ils vegls han urbarisau e las funtaunas ord las qualas els han buiu. Tuttina ei il Rein che serpegia atras la vallada, tuttina ein las selvas verdas e las pezzas titanicas, ch'han sesusteniu cheu mellis de tschentaners encunter las tempiastas dil tschiel e las agitaziuns della tiara. Empau aschia ein stai ils avdents da quella culegna. Cheu vivevan 11 umens cun lur famiglias, 11 umens curaschus disai els stempraus, els prighels dils cuolms, umeneris che temeivan buc il damaun.

Els possedevan quella veglia, veglia sabientscha de quels ch'han viviu cun ils elements e cun il sulom. Els eran negin pievel ramplun. Da negin ded els ei vonzau in plaid, in discuors, ina letra. Els vesevan l'existenza aschia sco il pur ha adina viu ella, sco in cumbat encunter schitgira, scheltira, garniala ed outras plagas che encunter el mobilisescha la natira. Els fagevan ina veta dira, stentusa per puder preservar las casadas dils basegns e della fom.

Ozilgi essan disai ch'il daner ei la mesira dil success e della ventira. Mo els han anflau che la gronda cuntentientscha derivi de producir igl agen nutriment, l'atgna vestgadira. Casas e clavaus baghiavan els sezs. Lur plaschers eran ils plaschers natirals, che Dieus tschenta enten ils cors dils carstgauns ils pli fortunai. Sin spundas suleglivas, en tegias spattitschadas avdavan els, mo cu els fagevan lavur cumina, mavan ell' uiara ner tier vaschins, furmavan els ina unitad sco ils cuolms e las valls.

Con hai jau partertgau vid vus dell' ucliva bandunada! En vossa sempladad eras biar pli rechs e sabis ch'ils gronds da quest mund e pli cuntents. Vies spert plein carezia per nossa mumma tiara sgola aunc adina atras vitgs e valladas. Vus eras purs da plaid e da cuderhas, da tgau dir mo cor lom. Vus eras 11 umens curaschus, disai els stempraus, els prighels dils cuolms, umeneris che temeivas buc il damaun.